

## EPHESIANS

<sup>1</sup> Yinga Paul, Krista Jesuaka apostle nama. Altjirra erarrpa yinganha urraraka. Atha pepa nhanha relha alkngaltara rrakangkarrurna yairnama, rrangkarrala pmara Ephesus-ala namanga. Yinga kaltja rrangkarra ilporatha kuta Krista Jesualela nyinterrakala namanga. <sup>2</sup> Altjirra Kaarta nurnakanha, Ingkarta Jesua Kristanha turta, rrakangkarra ngwanga pa rilhera ntelalhama.

*Altjirrala nurnanha Kristarlarlanga lyekarrikalaka*

<sup>3</sup> Nurna Ingkarta nurnakanha Jesua Kristaka Altjirra pa Kaarta tnanjtijika. Era kunha nurnanha Kristalela nyintalhelamala marrilaka. Era turta nurnanha Altjirraka Enkakanha yearriperra ingkarraka nthakala. <sup>4</sup> Arai, Altjirrala alha pa alkira nhanha itjantema arrpmanakalanga, era nurnanha kala Kristarlarlanga urraraka ekuranga urlarra relha alkngaltara pa mpulya nitjika. <sup>5</sup> Era nurnaka kangkaka. Era turta nurnanha Jesua Kristarlarlanga urraraka 'lira ekurantama nitjika, erarrpa antja nakalanga. <sup>6</sup> Nurnantama Altjirranha tnanjtijika era nurnaka ngwanga inthorra ntelalhakalanga, 'Lira kangkintja ekuranharlarlanga.

<sup>7-8</sup> Altjirranha nurnaka ngwanga inthorra, inangkarla inthorra turta ntelalhaka. Kristaka

alhwarlarlanga era nurnanha tangkalhelaka, konna nurnakanha iwumala. <sup>9</sup> Iwunhakama Altjirranha imanka nhangantema eterraka? Nhanha era kala nurnaka imarnakantama Kristarlarlanga. <sup>10</sup> Lakinhangana nurna kaltja, antala ar-ratjala, Altjirranha antja nama Kristanha relha ingkarrakaka, tnontha ingkarrakaka, alha nanhaka, alkiraka turta Ingkarta nitjika.

<sup>11</sup> Imankantema Altjirranha eterraka relha Jew nurnanha tangkalhelitjika Kristarlarlanga. Lyarta era nurnanha kala Kristarlarlanga ur-raramala tangkalhelakantama, erala nhanga eterrakala ngerra. <sup>12</sup> Era nurnanha urraraka, nurnakimparra Kristanha tnakamala, erinha kn-garra tnantjitjinanga. <sup>13</sup> Relha Lorinya rrangkar-ranhanha turtantama era Kristarlarlanga urrarakantema, rrangkarra Yia Marra erinha wumalanga. Kurunga rrangkarra Yia Marra erinha tnakamalanga, Altjirrala Enka Alkngaltara erinha rrakangkarrurna yairnaka. Enka Alkngaltara erinha kunha Altjirrala imankantema lhelakala relhurna yairnitjika. <sup>14</sup> Enka nhanha erinha Altjirrala nurnakurna mparrama kuta yairnaka, nurnakalela nitjika, nurna kaltja nitjinanga era nurnanha ingkarna nthurrrpa inthorra pmara ekuranhurna kngetnitjinala. Nurnantama erinha tnantjiai era makalaria inthorra namanga.

*Paul-ala etnakakwia Altjirranhanha dangkilaka. Era etnakakwia Altjirrunhanha ingkaka turta*

<sup>15</sup> Atha wuka rrangkarra Ingkarta Jesuanhanha kuta tnakamanga, rrangkarra turta relha alkn-galtara ntjarraka kangkintja ntelalhamanga.

<sup>16</sup> Lakinhangá yinga Altjirruna ingkamalanga, atha erinha kutatha rrakangkarrakwia dangkilama. <sup>17</sup> Yinga turta Ingkarta nurnaka Jesua Kristaka Altjirruna, Kaarta makalaria ekururna ingkama, era Enka ekuranha rrakangkarrurna yairnitjika. Rrangkarrantama inangkarla nitjinanga, Altjirra kaltja inthorra turta. <sup>18</sup> Rrangkarra turtantama katha inthorra lhangkaritjina, Altjirrala rrangkarranha urarakala anma ekuralela nitjika, pmara makalaria ekuranhala, relha alknaltara ingkarrakalela.

<sup>19</sup> Yinga turta antja rrangkarra nhandhaka kaltja nitjika. Nurna Altjirranha tnakamalanga, Altjirranha ekarlta inthorra ntelalhama, nurnakanga kwanala. <sup>20</sup> Era ekarlta inthorra ntelalhama, erala ekarlta inthorra ntelalhakala ngerra, era Kristanha relha errilknga ntjarranga kamalhelamalanga, erinha akwa mpinya ekuranhaka turtantama arrarnamalanga, alkirala. <sup>21</sup> Lyarta Krista erantama tjitjarta nama relha itornka ingkarrakaka, angel ingkarrakaka, enka korna ingkarrakaka turta. Era lyarta kala tjitjarterrama, era turta ngampakala tjitjarterritjina. <sup>22</sup> Altjirrala erinha ingkairnaka relha ingkarrakaka, enka ingkarrakaka turta Ingkarta nitjika. Era turta erinha ingkairnaka worlamparinya kapurta nitjika, era worlamparinya etnanha ntarntaritjinanga. <sup>23</sup> Worlamparinya etna kunha Kristaka mpurrka nama. Kristanha turta mpurrka ekuranhala nama, Altjirranhala Kristanga kwanala namanga ngerra.

## 2

### *Kristarlarlanga Altjirra erarrpa nurnanha tangkalhelaka*

<sup>1</sup> Arrkurla nhangá rrankarra kala relha errilknga ngerranta kuta naka, rrankarra Altjirra itja kangkwerrakalanga warta, rrankarra turta korna kuta ntelalhakalanga.

<sup>2</sup> Rrankarra kala errintjaka kangkwerritjata, urrkapunhapunha ekuranha turta nitjata. Relha etnala lyarta Altjirra itja kangkwerrama, etna kunha errintja ekura kuta kangkwerramantema.

<sup>3</sup> Nurna kala etna ngerrantema nitjata. Nurna lherrintja korna nurnakanhaka kangkwerritjata. Altjirranhantama nurnaka aalerraka, nurnanha tutjika naka turta.

<sup>4</sup> Altjirranha pula nurnaka montjamontja inthorra, kangkintja inthorra turta ntelalhaka.

<sup>5</sup> Era nurnanha tangkalhelaka, erarrpa ngwanga namanga. Nurna relha errilknga ngerra naka, korna nurnakanhanga arrkngala. Altjirrala pula nurnanha Kristarlarlanga etathilaka.

<sup>6</sup> Nurnanha Kristalela nyintalhelamala, era nurnanha kamalhelaka, nurnanha arrarnaka turta Kristalela nitjika, alkirala. <sup>7</sup> Altjirranha lakinha ntelalhaka, relha ingkarraka inthorra kaltja nitjinanga, lyarta anma turta, era Krista Jesuarlarlanga relha ingkarrakaka ngwanga ntelalhakala.

<sup>8</sup> Arai, Altjirrala rrankarranha tangkalhelaka, rrankarra ngwanga ntelalhamala, rrankarra erinha tnakakalanga. Altjirrala rrankarranha tangkalhelaka erarrpa antja nakalanga, itja rrankarra relha marra

nakalanga. <sup>9</sup> Rrangkarra itja turnintja ekuranhaka kangkwerraka. Lakinhanganga rrangkarra yarna ekuranga urlarra tnakalhama. <sup>10</sup> Arai, Altjirra erarrpa nurnanha Krista Jesualela nyintalhelamala lyartinyilaka, nurna relha arrpunhaka arratja kangkintja turtantama ntelalhitjinanga. Lakinhaka kunha Altjirranha antja nakala.

*Nurna Kristalela nyinterrakalanga warta, nurna kala worla nyintantama nama*

<sup>11</sup> Ipangkai, rrangkarra kunha Relha Lorinya nama. Relha Jew ntjarrala turta rrangkarra nhanganga arrampowutjata, rrangkarra itja artwerakalanga mpaarangeranga etnakanhamalkura. <sup>12</sup> Imanka nhanganga rrangkarra itja Kristaka kaltja naka. Rrangkarra itja Altjirra nhanganga Israel-aka ramarama ngerra. Altjirra nhanganga Israel-aka ramarama lhelaka, era Altjirra etnaka nitjinala, etnanha tangkalhelitjinala turta. Nhanha pula itja rrankangkarralka naka. Rrangkarra Altjirrakunya, marntilparla wara naka. <sup>13</sup> Altjirranha itja tjina rrankangkarra naka. Lyarta pula rrangkarra Krista Jesualela nyinterrakalanga, rrangkarra Altjirra tjinantama nama, Kristaka alhwarlarlanga.

<sup>14</sup> Arai, Israel-aka ramarama, Relha Lorinya ntjarra turta leltja nitjata. Kristala pula nurnanha rilherilaka. Nurnantama worla nyinta nama. Artwa Krista erarrpa <sup>15</sup> turnintja pa mpaarangeranga ingkarraka inthorra mangkilaka, era worla tharranga, worla nyintantama mpaaritjinanga, etnanha rilherilamala. <sup>16</sup> Era

turtantama worla nhanha Altjirralela rilherilaka, ntolkala ilumala. <sup>17</sup> Kristalantama Relha Lorinya rrangkarranha kaltjinthaka, Altjirranha rrankangkarralela rilhererrakala. Era turta Israel-aka ramarama kaltjinthaka, Altjirranha etnakalela rilhererrakala. <sup>18</sup> Arai, Kristanga arrkngala nurna ingkarrakantama Kaarturna irrpthala ingkama, Enka Alkngaltara nyinta ekurarlarlanga.

<sup>19</sup> Lakinhangha Relha Lorinya ntjarrai, rrankarra itja wotha relha epinya nama, ankealtha paka. Rrankarra pula Altjirraka pmararinyatitja nama. Rrankarra turta Altjirraka tjina inthorra nama, relha alkngaltara arrpunha ingkarrakalela. <sup>20</sup> Arai, rrankarrala Altjirraka worla namanga, rrankarrataka iltha ngerra nama. Iltha nhangha erinhala kaltjinthanhinhanha ntjarrala, apostle ntjarraka angkatjakarlaka itakala ngerra, Altjirraka urrpia ntjarraka angkatjakarlaka turta. Iltha nhanha ekura foundation kunha Krista Jesuanha nama. <sup>21</sup> Era worlamparinya etnanha nyintalhelama, errkuma turta, etna Ingkarta-aka iltha alkngaltara nitjinanga. <sup>22</sup> Rrankarra turta bricks ngerra nama iltha nhanha ekurala, iltha nhangha Kristalala itakala Altjirraka Enkaka.

### 3

*Kristala Paul-anha Relha Lorinya ntjarrurna yairnaka, etnanha kaltjinthitjika*

<sup>1</sup> Yinga Paul jail-ala nama, yinga Krista Jesuaka kangkwerrakalanga, atha turta Relha Lorinya rrankarranha kaltjinthakalanga.

<sup>2</sup> Kalapanhama rrankarra wuka Altjirrala yinganha urrarakala rrankarranha ilitjika era ngwanga namanga. <sup>3</sup> Angkatja nhanha era arrkurla lauwukala. Ngurrukalkurantama

era angkatja nhanha nuka kathilaka. Atha kala rrankarranha nhanhiperra kurrka intalhelakala. <sup>4</sup> Rrankarrantama

angkatja ekura read-erramalanga, rrankarra lhangkaritjina yinga kaltja namanga, angkatja nhanga Altjirrala lauwukala, era Kristiperra namanga. <sup>5</sup> Altjirrala itja angkatja nhanha arrkurla relhaka ilaka paka. Lyarta

pula Altjirraka Enkala angkatja nhanha kathilakantama, apostle ntjarraka, Altjirraka urrpia ntjarraka turta. <sup>6</sup> Angkatja nhanga

Altjirralala lauwukala, erataka nhanha nama. Krista Jesuanga arrkngala, Relha Lorinya ntjarrala Yia Marra erinha tnakamalanga, etna turtantama Altjirraka tjina nama, Israel-aka ramarama ngerra. Etna, Israel-aka ramarama turta, kala worla nyintantama nama. Etna, Israel-aka ramarama turta, anma Altjirraka pmara alkirarinurna irrputjina, porta kuta.

<sup>7</sup> Altjirranha nuka ngwanga ntelalhaka. Yinga ekura irrpaltherramalangantema, era yinganha urraraka urrkapunhapunha ekura nitjika, relha ntjarranha Yia Marra erinha kaltjinthitjika turta.

<sup>8</sup> Yinga relha alkngaltara ingkarrakanga, relha kornakornalkura era naka. Altjirranha pula nuka ngwanga ntelalhaka, yinganha urraraka

turta, Relha Lorinya ntjarranha kaltjinthitjika Krista nyintanta tjiparra namanga. <sup>9</sup> Altjirra, erala alha, alkira, relhalka ingkarraka arrp-marnakala, era antja naka atha relha ingkar-rakanha ilitjika, angkatja nhanga erala arrkurla lauwukala. <sup>10</sup> Kurunga worlamparinyarlarlangantama, Altjirrala enka korna alkirarinya ntjarranha ntelitjika antja naka, era inangkarla inthorra namanga.

<sup>11</sup> Tjontintjanga kuta Altjirranha lakinha eter-rakala. Erantama nhanha kala nthurppilaka Krista Jesua, Ingkarta nurnakanharlarlanga. <sup>12</sup> Arai, nurna Kristalela nyinterrakalanga, nurna erinha tnakamanga turta, nurna kala tnoatnoa Altjirrurna ingkama. <sup>13</sup> Rrangkarrantama itja inpora wulhitjika, yinga rrakangkarrakwia nyingalauwumanga. Yingataka rrakangkarra mar-rakakwia nyingalauwuma.

*Paul-anha Altjirrurna ingkaka, Ephesus-arinya ntjarrakakwia*

<sup>14</sup> Yinga Kaartanga urlarra mparalela arrarnalhama. <sup>15</sup> Era Kaarta nyinhanganhanga ingkarrakaka nama, alhala, alkirala turta. <sup>16</sup> Era ekarlta inthorra, makalaria inthorra turta nama. Yingantama ekururna ingkama, Enka ekuranhala, enka rrakangkarranha ekarltilitjika. <sup>17</sup> Yinga turta ekururna ingkama, Kristanha rrakangkarranga kwanala kuterritjika, rrangkarra erinha tnakamanga warta. Rrangkarrantama kaltja nitjina Kristanha rrakangkarra nthurppa kangkamanga. Rrangkarra turtantama tnoatnoa nitjina.



18 Kurunga rrankarra lhangkaritjina, relha alkngaltara ingkarrakalela, Altjirraka kangkintja arrpunha inthorra namanga, 19 Kristaka kangkintja turta arrpunha inthorra namanga. Kurunga Altjirra erarrpa rrankangkarranga kwanala nitjina.

20 Altjirranha nurnaka kngarralkura irrpalthala tangitjala nama, nurnala erinha pmarramangatjina, nurnala eterramangatjina turta. Era kala nurnaka tangitjala nama, Enka ekarlta ekuranha nurnakanga kwanala namanga warta. 21 Worlamparinya nurnantama erinha ngampakala tnantjitjika, Krista Jesuarlarlanga. Amen.

## 4

*Relha tnakanhakanha twetakatweta etna, kala worla nyinta nama, Kristalela nyinterrakala warta*

1 Lalinhakakwa yinga, yingala Ingkarta-kakwa nhanha jail-ala namanga, yinga rrankangkarra angkatja ekarltala ingkama. Ingkarta-ala rrankarranha urrarak, tangkalhelaka turta, rrankarra relha ekuriltja nitjika. Kala relha ekuriltja ngerrantama ntelalhai, 2 porapora, ngwanga turta. Itja parrpa aalerritjika, kangkintja pula ntelalhitjika. 3 Kutatha thakerrai tjina tnakanhakanhalela rilhera nitjika, Altjirraka Enkala rrankarranha tjinilakalanga. 4 Arai, rrankarra ntjarra kunha mpurrka nyinta nama. Rrankarra ingkarrakala Altjirraka Enka nyinta erinha tnyinama. Rrankarra ingkarraka porta kuta

kaaralhama, pmara Altjirralala nurnanha lhelakalurna irrputjika. <sup>5</sup> Rrakangkarra ingkarrakaka Ingkarta nyinta nama. Rrangkarra ingkarrakala Altjirra nyintanha tnakama. Rrangkarranha ingkarraka rretnya nyinturna kaltjirrpulhelakala. <sup>6</sup> Nurnaka ingkarrakaka Altjirra pa Kaarta nyinta nama. Era nurnaka ingkarrakaka Ingkarta nama. Era nurnaka ingkarrakarlarlanga urrkapuma. Era turta nurnaka ingkarrakanga kwanala nama.

<sup>7</sup> Nurnaka ngwanga ntelalhamala, Kristala nurnanha nyintaminyintanha pelaka, erarrpa antja nakala ngerra. <sup>8</sup> Nhangga Altjirraka Angkatja Imankinyala ilama,

“Era kartninya inthorrurna ntjinhamala, era errkukala ntjarranha ekuralela kngetnaka.

Era turta relha ntjarranha pelaka.”

<sup>9</sup> Ngunhantama “ntjinhakala era”? Kristanha kunha, erala alha kwanurnarrka irrputkala. <sup>10</sup> Kurunga erala alha kwanurna irrputkala, erantema alkira etnakanga urntwarra inthorra ntjinhaka, era kala panpalantama nitjinanga.

<sup>11</sup> Kristalantama worlamparinya ekurannya pelaka urrputja arrpunha ingkairnamala apostle nitjika. Urrputja arrpunha Altjirraka urrputja nitjika. Urrputja arrpunhala relha ntjarranha Yia Marra erinha ilitjika. Urrputja arrpunhala worlamparinya etnanha tnairnitjika. Urrputja arrpunhala worlamparinya etnanha

kaltjinthitjika. <sup>12</sup> Erataka relha nhanha etnanha ingkairnaka, etna relha alkngaltara ntjarranha kaltjinthitjinanga urlarrakurlarra tangitjala nitjika, tjina tnakanhakanha ekarlilitjika turta. <sup>13</sup> Kurunga nurna ingkarrakala Altjiraka 'Lira arratja tnakitjinanga, erinha arratja lhangkaritjinanga turta. Nurna turtantama relha mangkakala ngerra nitjinanga, Krista ngerra inthorra turta.

<sup>14</sup> Kurunga nurna itja wotha katjia ngerra nitjina, kaltjinthanhinthanha pmatha nahanhakarrika kangkwerramala, orrtjaltha tanhaka paka. Paala kaltjinthanhinthanha etna kunha relhanha parrpartilamanta, angkatja orrtjerrintjala. <sup>15</sup> Nurna pula kutatha angkatja nthurpanta urlarrakurlarra angkitjika, kangkintja turta ntelalhitjika. Nurnantama Ingkarta nurnaka Krista ngerrerritjina. Era worlamparinyaka kapurta nama. <sup>16</sup> Era turta mpurrka ekuranha, nahanhatitja worlamparinya etnanha, errkuma, nyintalhelama turta. Worlamparinya etnantama ekarlterrama tnakanhakanha etna urlarrakurlarra kangkintja ntelalhamalanga, urlarrakurlarra tangitjala namalanga turta.

*Nthakinhantama relha tnakanhakanha ntelalhitjika?*

<sup>17</sup> Nhanhantama atha rrangkarranha ilama, Ingkarta-aka rretnyala turta tjtjatuma. Rrangkarra itja wotha marntilparla ntelalhitjika, Relha Lorinya ntjarra ngerra. <sup>18</sup> Etna yarna arratja etarlarama. Arrthata, irtirta turta, etna Altjirraka kotna nama. <sup>19</sup> Kala porakunyantama

etna thakerrama ntaiyawutjika, korna ntelalhitjikanta turta.

<sup>20</sup> Rrangkarra pula itja Kristiperra lakinha kaltjerraka. <sup>21</sup> Rrangkarra kala wuka, nurna turta rrankarranha Jesuiperra arratja kaltjinhaka. Nhangha lakinha. <sup>22</sup> Rrangkarra itja wotha lherrintja korna rrakangkarranhaka kangkwerritjika, rrankarrala etnaka imanka kangkwerritjata ngerra. <sup>23</sup> Rrangkarra pula Altjirraka Enkanha impurlarrarnitjika eterrintja rrakangkarra lyartinyilitjika. <sup>24</sup> Rrangkarra turtantama arratja ntelalhitjika, alknaltara turta, Altjirralla rrankarranha arrpmarnakala ngerra.

<sup>25</sup> Arai, nurna ingkarraka mpurrka nyinta nama. Lakinhangha rrankarra itja tjina tnakanhakanhurna orrtjerramala angkitjika. Kala angkatja nthurpanta angkai. <sup>26</sup> Rrangkarra paka tjina tnakanhakanhaka yirrkngerramanga, rrankarra erinha itja kornilitjika. Lirnga era turta itja irrputjika, rrankarra yirrknga kuta namalanga. <sup>27</sup> Rrankarrataka errintja ekuranga aralhitjika.

<sup>28</sup> Unta paka nyilkngampa namanga, unta itja wotha nyilkngala initjika. Unta kala urrka-putjikanta, unkwanga marna intitjinanga, unta turta paka relha ilknaraka tangitjala nitjinanga.

<sup>29</sup> Rrangkarra itja angkatja ulpurta angkitjika. Rrangkarra pula angkatja marra angkitjika, angkatja nhanga relhanhala tjiapatjipilama turta.

<sup>30</sup> Rrangkarra itja Altjirraka Enka Alknaltara erinha paatalhelitjika. Enka era kunha rrankar-

ranha tnyinama, rrangkarra kaaralhamalanga Jesuanha pitjalputjika.

<sup>31</sup> Rrangkarra itja arrpunhanha kapanha tutjika, ekura aalerritjika, unpaarterritjika paka, erinha iltitjika, ekuriperra yia alpmelitjikalka paka. <sup>32</sup> Rrangkarra pula ngwanga ntelalhitjika, arrpunhaka konyerritjika turta. Nyintaminy-intala turta korna arrpunhaka iwutjika, Altjirralala korna rrakangkarranha iwukala ngerra, rrangkarra Kristalela nyinterramalanga.

## 5

<sup>1</sup> Lakinhangha rrangkarra Altjirra ngerra ntelalhitjika, era rrakangkarra, katjia ekuranhaka, kangkakilanga warta. <sup>2</sup> Rrangkarra turta relha arrpunhaka kangkintja ntelalhitjika, Kristanha rrakangkarra kangkintja ntelalhakilanga. Arai, imanka priest ntjarrala lamb-alka errilknga tutjata, Altjirranha tjauwerrilya nthitjika, relhaka kornakakwia. Lakinha ngerra Kristanha turta nthalhaka, etna erinha tjauwerrilya ngerra errilknga tutjika. Tjauwerrilya nhanhaka Altjirranha kangkaka.

<sup>3</sup> Rrangkarra relha alknaltara nama. Lakinhangha rrangkarra itja inthorra ntaiyawutjika, korna mpaaritjika, yulthakalka kngarra inthorra antja nitjika. <sup>4</sup> Rrangkarra turta itja angkatja ulpurta, irtirta, lhurrkurta paka angkitjika. Nhanha itja marra nama. Marralkura rrangkarra Altjirranha dangkilitjika. <sup>5</sup> Rrangkarra kala kaltja, relha erala ntaiyawuma, korna mpaarama, yulthakalka paka kngarra inthorra antja

nama, era kala orrtja altjirraka urrkurrkintja nama. Erantama itja inthorra Krista tharraka, Altjirra tharraka pmara ngampakalurna irrputjina. <sup>6</sup> Relha arrpunhala paka rrangkarranha ilamanga, yinga kula nhanha orrtjerramala wara angkamanga, rrangkarra erinha itja tnakitjika. Altjirranhataka relha etnaka aalerramanta kuta, etnala ekura itja kangkwerramanga. <sup>7</sup> Lakinhangra rrangkarra itja etnaka lhangalhitjika.

*Rrangkarra itja wotha thapathapala ngerra nama, parrtjala ngerra pula*

<sup>8</sup> Arai, rrangkarra kunha arrkurla thapathapala ngerra nitjata, relha korna warta. Lyarta pula rrangkarra parrtjala ngerrantama nama, rrangkarra Kristalela nyinterrakalanga. Kalantama rrangkarra ntelalhai relha parrtjalala namala ngerra. <sup>9</sup> Relha erala parrtjala nama, era kangkintja, arratja, pmathakunya turta ntelalhama. <sup>10</sup> Iwunha arrpunhaka turtama Ingkartanhanha antja nama? Nhanhaka kaltjerritjika arrkarnalhai. <sup>11</sup> Relha arrpunha ntjarra pula thapathapala ngerrantema nama. Rrangkarra itja etnaka lhangalhitjika. Rrangkarra pula etnanha alknghatharra ilitjika etna paala ntelalhamanga. <sup>12</sup> Arai, nhanga etnala ntelalhama, nhanhiperrataka relha angkitjikalka porerrama. <sup>13</sup> Parrtjala turta kathilama nhanha korna namanga. <sup>14</sup> Relhala turtantama irrpalthala lhangkarama nhanha korna namanga. Angkatja arrpunhala ilama,  
 “Relha untala ankwentama, kaarrerrai!

Relha untala errilknga ngerra intama,  
kamerrai!  
Kurunga Kristaka parrtjala nganha  
parrtjilhelitjina.”

<sup>15</sup> Rrangkarrataka relha inangkarla  
ngerra ntelalhitjika, itja relha irtirta  
ngerra. <sup>16</sup> Lyarta kunha relha ingkarraka  
korna inthorra nama. Rrangkarra pula  
arltamarlta relha Altjirrala tangkalhelakala  
ngerra ntelalhitjika. <sup>17</sup> Rrangkarra itja  
marntilparla nitjika. Relha Inkartaka kaltja  
ntjarra ngerra pula. <sup>18</sup> Rrangkarra itja  
kornilalhitjika, drunk-erramala. Rrangkarra  
pula Altjirurna ingkitjika era Enka Alkngaltara  
erinhatitja rrankangkarrurna yairnitjika,  
rrrankangkarranga kwanala nitjika. <sup>19</sup> Rrangkarra  
worlerramalanga, rrankarra tjiapatjipillarritjika  
psalm ilarramala, lyilhamala turta. Rrangkarra  
Inkartanha turta tnantjitjika. <sup>20</sup> Rrangkarra  
Altjirra Kaartanha turta kutatha dangkilitjika,  
Inkarta nurnaka Jesua Kristaka rretnya  
alpmelamala.

### *Noartiperra*

<sup>21</sup> Kristanha etarlaramala, rrankarra tjina  
tnakanhakanha rrankangkarranhaka kangkwer-  
ritjika.

<sup>22</sup> Arrkutja ntjarra noa etnakanhaka kangk-  
werritjika, etnala Inkartaka kangkwerramanga  
ngerra. <sup>23</sup> Artwa era kunha arrkutja noa

ekuranhaka itornka nama, Kristanhala worlamparinyaka itornka namanga ngerra, worlamparinyaka tangkalhelanha turta. Worlamparinya etna kunha Kristaka mpurrka nama.

<sup>24</sup> Worlamparinya etnantama Kristaka kangkwerramanga ngerra, lakinha ngerra arrkutja etna turta noa etnakanhaka kangkwerritjika.

<sup>25</sup> Artwa ntjarrai, rrangkarra kunha noa rrakangkarranhaka kangkitjika Kristanhala worlamparinyaka kangkakala ngerra. Era worlamparinya etnakakwia ilukala. <sup>26</sup> Era worlamparinya etnanha alkngaltarilaka, etnanha ilknigimala ngerra, kwatjala, angkatjala turta. <sup>27</sup> Worlamparinya etnantama makalaria inthorra, tji-parra inthorra, alkngaltara inthorra turta nitjinanga.

<sup>28</sup> Lakinha ngerra artwa etnakathaka nama noa etnakanhaka kangkitjika, etnala mpurrka etnakanhaka kangkamanga ngerra. Artwa erala noa ekuranhaka kangkama, era kala ekuriltja kangkama. <sup>29</sup> Arai, artwa kunha itja mpurrka ekuranhaka antjakunyerrama.

Era pula mpurrka ekuranha ntuthilama, ntarntarama turta. Lakinha ngerra Kristala turta worlamparinya ekuranha, nhanhatitja mpurrka ekuranha ntuthilama, ntarntarama turta. <sup>30</sup> Nurna turta Kristaka mpurrka nama.

<sup>31</sup> Nhangha Altjirraka Angkatja Imankinyala ilama, “Lakinhangathoa artwala kaarta pa mia ekuranha impurlalhama noakartantama nitjinala. Noarta eratharrantama mpurrka nyinterritjina.” <sup>32</sup> Nhanha kunha angkatja kngarritja inthorra era. Nukanga urlarra



Kristanha, worlamparinya etna turta lakinha ngerrantema nyinterrakala nama. <sup>33</sup> Artwa nyintaminyintantama noa ekuranhaka kangkitjika, erala ekuriltja kangkamanga ngerra. Arrkutja nyintaminyinta turta noa ekuranhaka arratja ntelalhitjika.

## 6

### *Katjia, kaarta mia turta*

<sup>1</sup> Katjia ntjarrai, rrankarra kaarta pa mia rrankangkarranhaka kangkwerritjika. Nhanha arratja nama, rrankarra Ingkartalela nyinterrakalanga warta. <sup>2</sup> “Unta kaarta pa mia unkwanganhaka kangkwerritjika.” Rrankarra turnintja nanhaka kangkwerramanga, Altjirala rrankarranha nyintaminyintanha lhelama <sup>3</sup> “ungkwangalela marra nitjina, unta turta pmara unkwanganhala kuterritjina.”

<sup>4</sup> Kaarta ntjarrai, rrankarra itja katjia rrankangkarranha rrankalhelitjika. Rrankarra pula etnanha montjala Ingkartaka tjaiya kaltjinthitjika.

### *Itornka, urrkapunhapunha turta*

<sup>5</sup> Relha urrkapunhapunha ntjarrai, rrankarrataka itornka rrankangkarranhaka ilporatha inthorra kangkwerritjika, rrankarrala Kristaka kangkwerramanga ngerra. <sup>6</sup> Rrankarra etnaka kutatha kangkwerritjika, itja nhanga etna rrankarranha aramalanganta. Rrankarra Kristaka urrkapunhapunha namanga warta,

rrangkarra itornka rrakangkarranhaka kangkwerritjika, rrangkarrala Altjirraka kangkwerramanga ngerra. <sup>7</sup> Rrangkarra etnaka arrkana kuta urrkaputjika, Inkartaka ngerra. <sup>8</sup> Arai, unta urrkapunhapunha paka namanga, itornka paka, Inkartala nganha kala kwartiwutjina unta arratja ntelalhamanga.

<sup>9</sup> Itornka ntjarrai, rrangkarra turta urrkapunhapunha rrakangkarranhaka ntelalhitjika, rrangkarrala Kristanga urlarra ntelalhamanga ngerra. Rrangkarra etnanha itja iltitjika. Arai, rrakangkarra, etnaka turta, Inkartata nyinta wara nama alkirala. Ekuranga urlarra relha ingkarraka loala nama.

### *Altjirraka errauwia*

<sup>10</sup> Kala nhandantama. Rrangkarra kunha Inkartalela nyinterrakala. Ekarltantama ntelalharrirrai, Inkartala rrangkarranha kala ekartilakalanga. <sup>11</sup> Arai, errintja erataka rrakangkarra irrpaltherrama. Rrangkarrarrpa turta yarna ekuralela turrama. Lakinhanganga rrangkarra Altjirraka errauwia initjika. <sup>12</sup> Nurna kunha itja relhalela turrama. Nurna pula errintja etnakalela turrama, enka korna ntjarralela turta, etnala alkirala namanga, Altjirraka irrpaltherramanga turta. <sup>13</sup> Lakinhanganga Altjirraka errauwia ingkarraka inarrirrai, rrangkarra etnakalela irrpalthala turritjinanga, etna rrakangkarra irrpaltherramalanga. Kurunga etnakalela turramaliperra, rrangkarra itnatjinanga kuta.

<sup>14</sup> Rrangkarrantama errintja ekura kaaralhai, kala Altjirraka errauwiaka ekarralhakala.

Altjirraka Angkatja nthurpa era rrakangkarra belt ngerra nitjika. Altjirraka angkatja, “Unta nukanga urlarra kala arratja nama,” era rrakangkarra irna inarnkakanha ngerra nitjika. <sup>15</sup> Yia Marra era rrakangkarra ingkakanha sandal ngerra nitjika. Rrangkarra turta thakerritjika, Yia Marra erinha relha ntjarranha ilitjika. <sup>16</sup> Rrangkarra Altjirranha ekarlta kuta tnakitjika. Nhanha rrakangkarra alkurta ngerra nitjika. Alkurta nhanhakarta rrangkarra irrpalthala ipalhitjina, errintjala rrangkarranha arrangkultha ekuranhala wamalanga. <sup>17</sup> Angkatja nhanga Altjirralala rrangkarranha kala tangkalhelakala, nhanha rrakangkarra helmet ngerra nitjika. Altjirraka Angkatja, ekurarlarlangala Altjirraka Enka relhurna angkama, era knife tjenya rrakangkarra ngerra nitjika.

<sup>18</sup> Rrangkarra kutatha Altjirrurna ingkitjika, Enkarlarlanga, rrakangkarriltja, relha alkngal-tara ntjarraka turtakwia. Itja kunpakunper-ritjika. Itja porrkerritjika, kutatha pula Altjir-rurna ingkitjika. <sup>19</sup> Nukakwia turta rrangkarra Altjirrurna ingkitjika. Rrangkarra ingkitjika era yinganha kaltjinthitjika Yia Marra erinha relha ntjarraka tnoatnoa kuta nentilitjika. <sup>20</sup> Yia Marra ekurakarta kunha Altjirrala yinganha relha ntjarrurna urrpia yairnakala. Yia Marra ekuranga arrkngala turtantama yinga lyarta jail-ala nama. Rrangkarra Altjirrurna ingkitjika, yinga tnoatnoa kuta angkitjinanga, nukathaka namanga ngerra.

*Paul-ala etnanha anparnaka*

<sup>21-22</sup> Arai atha Tychicus-anha rrakangkarrurna yairnama. Era tjina kangkintja nuka nama, Ingkarta-aka urrpia turta. Era kala rrangkar-ranha yia ingkarraka nukiperra alpmelitjina, rrangkarra kaltja nitjinanga. Angkatja ekuran-hala rrangkarranha kala tjipatjipilitjina.

<sup>23</sup> Tjina ntjarrai, Altjirra Kaartanha, Ingkarta Jesua Kristanha turta, rrakangkarra rilhera, kangkintja turta ntelalhama. Erinhatharra ekarlta kuta tnakai. <sup>24</sup> Altjirranha relha lenha ntjarraka ngwanga ntelalhama, etnala Ingkarta nurnaka, Jesua Kristaka, kuta kangkamanga.

**Altjirraka angkatja - Arrarnturna  
kngartiwukala  
The New Testament in the Western Arrarnta  
language of Australia**

copyright © 1997 Bible Society of Australia

Language: Western Arrarnta (Arrarnta, Western)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-05-14

---

PDF generated using Haiola and XeLaTeX on 11 Nov 2022 from source files dated 22 Nov 2019

e7dac67a-727e-547f-9edb-55e6c28bb3b9